

Au Beausset dans le Var, la municipalité se confronte concrètement à la mise en valeur de la langue



L'Oustau de Prouvenço au Beausset

Uno voulounta poulitico que si vis

Tre nouastro eleicien, la chourmo municipalo a mes en obro nouastro voulounta de proumòure la cultura e la lingo prouvençalo.

Uno dei proumièreis iniciativo fugué d'istala de bèlle placo de carriero, emé noum e entresigne en prouvençau. Uno de mei preferido es la Carriero de l'Egalita, qu'avèn apoundu : « la bèn noumado, que meno au sumentèri » ! Quàunquei renaire an di qu'avian degaia lei dardèno publico, mai pèr la majo part dei gènt e dei vesitaire li agrado aquelo meno de metre en avans nouastro cultura dins la vido vidanto dei vilajan.

Tre la debuto de nouastre mandat, avèn councèpu un nouèu buletin municipau que li dien « Vaqui lou Bausset » e que countèn uno pajo en lingo d'Oc / prouvençau qu'es souvèntefes escricho en grafio mistralenco, mai de còup que l'a, tambèn en classico. La majo part es escricho pèr la presidènto de l'Escolo deis Agasso Galoio, Anio Grosso, mai tambèn pèr d'àutrei gènt d'ou relarg (coumo Gérard Tautil de Signo, sus la toupounimio).

La coumuno es devengudo sòci d'ou Forum d'Oc e, de tout segur, la Mediateco es abounado à Aquò d'Aquí !

De festività e d'animacien divers

Au nivèu dei festività, avèn rebandi lou Carnavau Prouvençau que s'acabo chasqu'an pèr lou Jujamen en prouvençau / franchimand de Caramentran. Fin finalo, aquèu sara toujours crema sus la plaço publico bord qu'es toujours coupable ! Ispira pèr ce que si fa en Lengadoc (Pezenas), avèn tambèn lança Martror pèr la Fèsto dei Mouart. Es de nouta que de mai

en mai de gènt parloun aro de Martror en plaço de la famouso fèsto coumercialo d'ourigino celto...

Cado annado, ourganisan uno « Diminchado » au printèms. En 2023 èron lei « Rescòntres dau Baucet », en liame emé l'IEO 83, Forum d'Oc e CIRDÒC. Aquest an, pèr acaba la sesoun culturalo de la Maison des Arts, avèn agu un concert de Lavoia Lapo emé Manu Théron. Lendeman Manu a anima un estàgi de cant occitan sustengu pèr l'IEO 83, ajuda pèr l'Escolo deis Agasso Galoio.

Sian astra d'agué l'Escolo deis Agasso Galoio, fouaço ativo, que demai de douna de cous de lingo, ourganiso de noumbrousei manifestacien dins l'annado. Dins lou debana de soun « Printèms Prouvençau », l'associacien a inicia soun nouèu Fèstivale de Tiatre que permete a un publi assidu d'assista à de pèço en lingo nouastro de diversèi troupo d'ou relarg.

Fau dire tambèn que lou nouèu Coumita dei Fèsto « Baussetan Fai Peta », integro de mai en mai la dimensien prouvençalo dins sei manifestacien.

Tambèn d'acien simboulico, mai l'escoumesso es encaro grand

Dins lou trin dei celebracien d'ou 11 de Nouvèmbe passa, avèn istala, pròche d'ou mounumen ei mouart, uno lauso à la memòri d'ou Cors XVèn, e uno flour de camin pouarto desenant aquèu noum. La ceremounio fugué seguida pèr la proujeicien d'ou film MALATERRA, en presènci d'ou proudutour e d'un publi noumbrous.

Enfin, la municipalita vèn de douna à tres associacien prouvençalo baussetenco (Escolo deis Agasso Galoio, Oulivelo, Sant-Aloi), un loucau emé vitrino, pròchi de la coumuno. Sara « l'Oustau de Prouvenço d'ou Bausset » que leis associacien faran vièure touto l'annado : mostro, animacien, rescouantre pèr proumòure nouastro cultura, sa lingo, sei tradicien e seis atualita.

L'escoumesso principalo rèsto de touca leis enfant, lei jouine e sei famiho. Es pas tant eisa de faire rintra lou prouvençau à l'escolo publico ! L'an passa l'Escolo deis Agasso a fa quàuqueis intervencien, e aquest an avèn agu lou plesi d'acui Liza l'Occitane auprès de classo de CP (graci à l'ajudo d'ou Despartamen d'ou Var).

Avèn encaro de pan sus la canisso

Fa mestié d'agué fouaço enavans pèr metre tout acò en obro e, en-defouaro lou sustèn materiau e financiè de la coumuno, lou role dei benevole es essenciau. Mai aquèlei soun plus tròu jouine e la relèvo es pas assegurado.

Bessai que nous ajudara lou nouèu festivau « Espigoule Déboule » que sian en trin d'ourganisa en liame emé Christian Philibert e sa chourmo de Ginasservi ?!!



Place Jean Jaurès au Beausset

Les mots d'Oc

astra : favorisé
chourmo : équipe
crema : brûlé

dardèno : finances
debana : déroulement
de pan sus la canisso : du pain sur la planche
eisa : facile
enavans : énergie

entresigne : indication
escoumesso : défi
flour de camin : carrefour ; ici : rond-point
lauso : plaque
liame : lien
rebandi : relancer
renaire : grincheux
sumentèri : cimetière
vis : voit